


PL

2722

E517

1779

V.21



自序
言
一
二
三
四
五
六
七
八
九
十
十一
十二
十三
十四
十五
十六
十七
十八
十九
二十
二十一
二十二
二十三
二十四
二十五
二十六
二十七
二十八
二十九
三十
三十一
三十二
三十三
三十四
三十五
三十六
三十七
三十八
三十九
四十
四十一
四十二
四十三
四十四
四十五
四十六
四十七
四十八
四十九
五十
五十一
五十二
五十三
五十四
五十五
五十六
五十七
五十八
五十九
六十
六十一
六十二
六十三
六十四
六十五
六十六
六十七
六十八
六十九
七十
七十一
七十二
七十三
七十四
七十五
七十六
七十七
七十八
七十九
八十
八十一
八十二
八十三
八十四
八十五
八十六
八十七
八十八
八十九
九十
九十一
九十二
九十三
九十四
九十五
九十六
九十七
九十八
九十九
一百

測海集卷三

長洲彭紹升允初

思賢詠三

總督孟喬芳心亭

永平人隸鑲紅旗漢軍諡忠毅

心亭倜儻有權略善騎射我兵下永平以廢官覓錄數
從征伐有功大兵既定京師心亭帥師下河北抵長安
就拜兵部侍郎兼副都御史總督陝西三邊軍務時李
自成既南走而張獻忠尙在蜀陝西羣盜各擁衆阻險
與爲聲援恣行劫殺心亭大小百餘戰渠魁悉就戮撫
其衆十七萬六千有奇順治七年以功晉兵部尙書寇
亂既定請蠲荒田之糧報可九年大兵取成都餉不

繼退保寧廷議欲退守漢中心亭上言保寧不守則川
中諸要害與賊共之三秦無寧日矣不如駐保寧與漢
中爲犄角與屯廣元昭化間省秦民轉運之苦則賊平
可立俟也從之又令秦中兵民興屯于延慶平固及西
安鳳翔諸府歲得穀數萬斛由是荒土盡闢民始樂業
心亭善料敵諸將稟方略輒致勝又知人善任豁達無
嫌猜士故樂爲之用十年兼四川總督明年卒於官

孟公張六師撫秦兼控蜀十年洗創殘萬室安井牧知人實
豁達決勝何神速來者念前猷毋使邊民哭

巡撫王來任宏宇

正黃旗漢軍天聰八年舉人

康熙四年宏宇巡撫廣東疏陳廣東六大害一夫役廣

東頃因用兵差徭煩數額夫不足率權取民間後乃沿
爲故例遂有旬夫長夫短夫加夫諸名色其折銀始自
二三兩多至三十餘兩凡官兵往還傳送軍器修造衙
門應付使客或數千名或數百名少亦數十名大爲民
厲請 旨悉行禁革其應用夫役俱于驛傳報銷候部
核議二民船異時官使船每取辦民間已而官取河船
應用仍從民間征銀給之每一縣河船多者率數十每
一船歲費一二百金胥吏藉是挾括鄉里今募省會官
共捐銀造河船二百二十八備官使其故河船及一切
民船俱不復用仍請 旨禁 二采買自將軍提鎮以
下託名軍需徵取百物州縣委之里排里排取之百姓

並請 旨禁絕四私抽民間無賴冒入旗營橫行鄉里

私抽稅銀凡車牛米穀雞豚之屬無一獲免並請禁絕

五誣盜州縣獲盜不卽審訊姦胥黠隸教令攀引私讎

及諸富人嚴刑之下寃濫者衆請凡獲盜者必立究黨

羽毋得遲延妄害良善六擅殺各營塘報每遇盜發輒

稱盡行勦洗其被擒者卽行誅戮時有濫殺無從究問

請官兵出勦務別善惡其所俘獲悉應解審毋使擅殺

疏上 敕部詳議次第施行粵人大悅七年以絀誤還

京病卒遺疏復陳三事一論粵東設兵太多糜餉擾民

宜加裁省一論粵東邊界居民奉檄內遷流離失所者

至數百萬宜令復還故地一論橫石磯關口宜撤疏上

詔還民已遷之界瀕海之比復歸田里爲立廟祀之
初宏宇之罷也里排潘世祥等百餘人詣闕請留旣至
聞其卒痛哭而還

膏血曾幾何磨牙輒千萬騶虞不時來斯人久魚爛六弊徹
天聰日暖冰初泮艱難繪流民易簣猶繾綣

巡撫秦世楨瑞寰

廣寧人隸正
藍旗漢軍

順治八年瑞寰巡按江南時經兵燹後經界多冒亂官
爲丈量胥役藉是舞弊瑞寰令里長編魚鱗冊召田主
自相丈量悉復其舊州縣徵賦故多溢額至是給民易
知單示以科則定數又每甲彙列賦額及輸戶爲滾單
里長按戶遞傳旣輸則注之違則送縣追比令下蘇民

大便之遂條列以聞通行諸州縣異時徵糧擇富民
爲糧長漕卒恣意凌籍當之者家立破瑞寰請改官收
官兌其弊遂息會巡撫土國寶黷貨私徵賦稅動數萬
兩瑞寰列其罪狀以聞詔與督臣會訊國寶自經死
因奏免國寶所增諸稅尋擢浙江巡撫調操江坐事免
官

貪吏猛于虎食民盡脂膏不遇飛將軍太山有長號魚鱗燦
可數冤窟將安逃恭敬在桑梓爲公薦溪毛

總督佟養甲陸海

正藍旗
漢軍

順治二年陸海以內閣學士從征廣東四年授兩廣總

督故明唐王弟朱聿鐸僭號紹武陸海與提督李成棟

帥師進勦斬聿鑣廣州平加兵部尙書進收高雷廉三
府招降明趙王朱由校等軍所過紀律森嚴居民安堵
馳檄九府皆翕然歸化城郭初定量才授官絕苞苴謝
請託月率司道以下詣城隍廟誓于神以廉節相厲犯
者斥之時睿親王攝政遣官至粵采珠陸海上言粵東
產珠地惟廉雷二郡爲池者九廉八雷一皆有洪波巨
浪取珠之法用長繩數百丈縋蟹戶入池底往往果鯨
鱷之腹而得珠與不得尙未可知是取珠甚艱也前明
萬厯中遣宦者李敬采珠歲需夫役銀不下巨萬是所
費又甚繁也此在無事時尙得不償失況今蹂躪之餘
豈復堪此乞罷前命以寬民力固邦本疏聞召使者還

明年提督李成棟叛降永明王由榔督標兵少爲所襲
執陸海至肇慶大罵不屈被殺贈太子太保祀廣東名

宦祠

百仞下旋淵微生殉鯨鱷忍彼子遺民填此無涯壑絕域返
星槎春暉照寒郭何以薦明神矢心惟澹泊

總兵徐勇

籍貫未詳
諡忠節

順治十一年秋七月乙亥經略大學士洪承疇言湖廣
辰常總兵官徐勇當黔寇披猖時誓死固守屢挫賊鋒
賊以書誘降勇斬其使賊將白文選率衆攻辰城援絕
城陷督兵巷戰被創落馬更斬數人力盡見殺刃猶在
握賊衆忿之截手而去合門遇害者三十九人請加優

卹以屬臣鄧又言辰常道參議劉昇祚城陷被執逼授
僞官恣罵不屈立遭磔死合門男婦殺戮無遺辰州府
知府王任杞城陷罵賊支解而死其祖母母及諸眷屬
四十六人同時被害並請褒恤 詔贈勇太子太傅一
等阿思哈哈番祭九壇立祠餘贈恤有差

熱血灑孤城尸僵刃在握三十九人同糜爛骨與肉嗟哉劉
與王并命何其酷英風激雷聲一氣繞南岳

御史李森先琳枝

山東掖縣人
崇正十三年進士

順治二年琳枝以山東巡撫方大猷薦起國子監博士
遷江西道試監察御史故明大學士馮銓先以魏闖黨
削籍戍邊及睿親王至京師以迎降功仍授大學士是

年八月琳枝與給事中許作梅莊憲祖杜立德御史王
守履桑芸羅國士鄧孕槐吳達等交章劾銓及其子源
淮諸貪穢狀并論侍郎孫之獬李若琳皆銓黨宜罷斥
刑部鞫問無實擬反坐諸科道官詹親王以琳枝疏有
請將馮銓父子肆諸市朝語獨削琳枝籍餘不問順治
八年 世祖親政逐銓歸復琳枝官尋補四川道

監察御史十三年夏奉 命巡按蘇松自秦瑞寰去吳
後繼至者多寬縱豪猾胥吏倚官爲暴琳枝鞫問得實
取其罪甚者杖殺之舉孝子貞婦雪諸冤獄衆大悅明
年春疏言張電臣所侵漕銀已追完請末減得 旨以
徇縱逮問至京事白復其官十五年五月應 詔陳言

請寬流徙諸言官李呈祥李開生李和魏瑄郝汝良烏
駿等援 恩詔因公註誤之例量子軫恤 世祖以

其市恩下吏部議奪官仍下刑部獄擬杖贖流尙陽堡
詔特原之還其官至十七年五月 命吏部察諸罪
謫言官量子省釋如琳枝言

鳴鐸奏昌言終始厲一節欲求百鍊剛昇以洪爐烈蹇蹇望
朋來惻惻愁井渫言興道亦亨進退保明哲

巡撫吳景道

正黃旗漢軍
諡愍僖

順治初景道官都察院理事上疏論睿親王過失王怒
削其籍謫戍邊徼二年起河南右布政尋遷河南巡撫
時流寇未靖景道招撫賊帥王良翰等四十餘人兵凡

十餘萬除荒田之稅輕其徭役民得安息十年報開封
諸府共開荒田萬一千二百五十頃以病乞休去之日
橐無餘金號泣追送者聲聞數里既卒祀河南名宦祠
眇哉文弱吏奮筆繩周公往蹇喜來反天日明孤忠伏莽有
馴虎中田輯哀鴻驅車謝父老驛路流清風

學道狄敬文止

江南溧陽人順治二年進士

順治中文止官屯員外郎出爲湖廣提學道爲人嚴冷
終日兀坐妻孥非呼召不敢前僮僕侍立如木偶人每
按部盛服坐堂上焚香告天取諸生卷面定其高下卽
發榜私謂不得行所拔士多窮巷老儒士氣大振號爲
鐵面學道秩滿去官卷冊數簏而已

土氣有伸屈學道爲之樞鐵面謝竿牘春風到達廬典型在
妻子行李惟圖書焚香拜聞闔天命誰敢渝

府丞姜希轍二濱

浙江會稽人

二濱由元城知縣入爲工科給事中屢陳百姓疾苦勸
世祖以寬大爲治時土疆新闢多逋稅催科者并
新舊征之二濱言量地所出止有此數移新補舊將并
新而逋之矣嘗請恤旱災因言有司酷罰之弊曰贖杖
本用輕鑲今倍五倍十小不應命鞭朴隨之是罰以省
刑而反以黷刑也時有司多以捐俸得紀錄二濱言如
此且恐有司營俸外之金冒非分之級是教貪也又言
逆賊歸命不當遽授顯職其切直多類此康熙初遷奉

天府丞乞歸

二濱本良吏達識洞民隱切深指事情綜核見悲憫所祈化
日舒忍俾陰雨窘卷耳不盈筐懷人獨心閔

侍郎田六善兼山

山西陽城人順治三年進士

順治中兼山官御史時天下初定承明之弊吏道雜頗
尙苛切兼山上疏請弛馬政勸廉吏以養百姓請寬蘇
松州縣官考成之法請飭督撫無縱貪吏又以經筵進
講爲時甚暫請于閒燕之餘日理經史以爲出治之本
康熙中累遷戶部侍郎致仕歸自言歷官四十年無一
念不可對天無一事或敢欺人

田公勇言事利害罔弗周審欲去殘賊與民其綢繆鶚立霜

氣勁虬奮春膏流誰與囁嚅者俯仰空包羞

尚書魏象樞環極

直隸蔚州人順治三年進士謚敏果

順治六年環極爲吏科都給事中時言官吳拜吳達以言事論死因疏論言官失言之罪不過處分處分當付吏部貪贓壞法挾怨報仇如是等罪乃下刑部今以失言而問大辟何以處貪贓壞法挾怨報仇者請嗣後分別重輕著爲成例此言路通塞之大關也有旨報聞又言上初親政宜慎起居不當遠出又因災變上言語侵權貴尤切直聲震朝野十一年大學士陳名夏得罪詔責言官不先舉劾貶光祿寺丞乞歸養母母喪服除以馮孔博薦再召爲御史康熙十七年授左都

御史明年京師地震時明珠索額圖執政以利權相傾
各樹黨排斥正人朝臣無敢言環極請對陳二相挾私
罔上狀明珠等皆惕息尋遷刑部尙書以病乞休去先
後疏薦湯孔伯于北溟陸稼書郝冰滌並爲時名臣
魏公佐兩朝忠鯁盡諫職挽弓百鈞強射虎落其魄獨立仗
主知勇退信道力翩翩慶同升井渫斯可食

尙書朱之弼右君

順天人順治三年進士

順治中右君官給事中極論六部遇事推委政務日弛
請行試詢考覈之法累遷至戶部右侍郎尋謫官十六
年授副都御史

世祖方嚴懲貪之令得贓十兩以

上者卽流塞北右君言此令出撫按所糾必無以大貪

人告者何則一經提問有司無不求減贓罪圖保身命
雖累千萬期不滿十兩而止然則有嚴令之名無嚴令
之實也 皇上但擇撫按一大貪者懲之擇撫按一

大廉者獎之衆貪懼衆廉奮矣十七年夏天旱因奏前
山東撫臣耿焞河南撫臣賈漢復墾荒不實歲增數十
萬之賦百姓重困怨苦之氣積爲沴厲宜加勸谿河南
報災戶部言六月內旱 皇上步禱甘霖大沛處處

有秋何以彰德衛輝獨請蠲恤有 旨覆勘右君固爭
以爲地有宸隆澤有羸縮雨露所滋豈無枯槁因極言
覆勘無益與戶部尙書王宏祚力爭于朝宏祚辭卒屈
康熙七年累遷工部尙書又言閩民攤賠兵米及諸徭

役之害 詔切責大吏多得罪去其弊遂革尋轉刑部
以會推事蒙 詰責同列者或勸之自明右君曰吾昨
一歲四遷不以無功辭今甫一謫卽以無過自白乎遂
歸老于家徐公肅言每議事與右君及魏環極接茵坐
三人所見略同也

右君議國是如彼三世醫能挾幽隱疾判若黑白碁退閒遂
林臥引咎寧置辭離立魏徐聞臭味何差池

尙書劉捷玉疊

直隸大城人順治三年進士諡端敏

順治中玉疊官給事中議緩征以惠災黎捐俸以拯流
亡貸牛種以業貧民皆下所司行之尋出爲山西河東
副使山盜竊發單騎往諭之散爲農累遷左副都御史

請蠲江西缺額之賦言江西當兵亂之後民逃田虛錢糧缺額不蠲則逃者不歸歸者復逃荒者未墾墾者仍荒蠲之便頃之遷刑部尙書康熙十八年以疾乞休臨終謂諸子曰行矣正衣冠而卒

劉公體仁者切切周下情仁心徧茅屋仁言緩輸征仁風渙羣盜佩犢歸春耕閒雲乍舒卷行矣了不驚

御史王伯勉東臯

河南湯陰人順治三年進士

東臯官文選司郎中常宿官廨五更起治文書每至日昃一不假吏胥手嘗言作吏部無他長只是不愆不忘率由舊章其可矣十餘年服一羊裘毛盡脫同僚爲製狐裘遺之不受曰伯勉生平不受人一錢何敢拜公等

賜同僚爲白尙書尙書強之受乃受之遷御史彊直敢
言事丁父憂歸服除晨起肅衣冠端坐而逝

王君掌文選羔羊

風受事不辭勩日昃表匪躬北門何

凜冽狐裘謝蒙茸先輩用心別來者難與同

給事中常若柱

陝西蒲城人順治四年進士

若柱官翰林食貧厲節老屋數椽一妻一僕而已拜給
事中順治六年秋八月上疏論賊相牛金星弑君殘民
抗拒王師力盡始逃是王法所不宥其子銓同父爲賊
冒濫作官任湖廣糧儲道爲巡按王守履所劾贓私巨
萬論罪當死且金星父子罪在萬世宜誅其家
以申國法而快人心疏入下部議落職賃一車夫婦共

載出國門僕步以從道旁父老皆太息或爲泣下十一年冬以原官起用未赴老于家

常君官禁近涼涼遠世情一朝拜封事白日轟雷霆解冠故不愧柴車亦平生多謝道旁叟太息還吞聲

考功顧予咸小阮

江南長洲人順治四年進士

小阮初知寧晉縣善治盜叅其渠爲耳目發捕輒得盜皆遠竄移山陰時浙東初附官兵多掠平民爲虜小阮悉縱遣請于上官罷兵以屬縣民得休息擢刑部主事調吏部遷考功員外郎移疾歸順治十八年江蘇巡撫朱國治索賄于吳縣令任維初維初私糶倉穀應之爲諸生所訐國治怒繫諸生五人于獄明日諸生作捲堂

文羣哭于文廟國治悉械繫欲致之死詣小阮白其故
小阮正色曰諸生訐令事皆實何罪當罪令國治益怒
會海寇入犯江南國治遂誣諸生通海十八人皆斬坐
小阮指使論絞尋奉 中旨召復前官國治懼乃以奏
銷案傾之凡逋稅銖兩以上者皆削籍小阮遂免歸
小阮聲如雷一鳴破春黑慷慨入囹圄從容謝徽纒哀哀山
陰俘慄慄寧晉賊功施信不凡匪特邦之直

修撰蔣超虎臣

江南金壇人順治四年進士

虎臣性淡泊斷葷血好方外交居京師時參大博和尚
一日入朝聞唱道聲豁然有省詣大博呈解大博徵詰
再三可之尋官順天學政清慎得士心秩滿告歸過百

泉謁孫鍾元去之匡廬造鹿門遂達峨眉居伏虎寺已
而得疾爲書別親友端坐吟詩而逝翼日有胡生者遇
諸山椒頻呼蔣先生不應及入寺知虎臣已死則大驚
積雪閉陰崖狼籍虎豹跡誰能脫軒冕來此臥盤石偶飲趙
州茶還攜葱嶺烏礪泉有遺音泠泠漱寒碧

總督朱宏祚徽蔭

山東高唐人順治五年舉人

康熙初徽蔭官盱眙知縣廉勤案牘悉手治黃私征省
餽獻歲旱請賑復措金二千以益之遷刑部廣東司主
事進貴州司員外郎陝西人坐逆黨應戍身死無子妻
當從戍而律無明文下部議徽蔭定議凡應戍身死其
妻有子者流無則免著爲令有殺一家三人者妻應流

巡撫以其舅姑老請留養尙書以非例不行徽蔭爭之
曰父母舅姑等耳 朝廷以孝治天下子婦何擇焉卒
許之遷兵部督捕郎中出爲天津道僉事二十六年巡
撫廣東過庾嶺異時使客多私徵役夫徽蔭移牒兵部
禁之廣東自軍興有司私徵歲至百餘萬徽蔭準故額
餘悉裁革衛所屯田畝徵米三斗三升徽蔭言民田賦
重者不過八升請比例酌減臨高澄邁吳川諸縣逋賦
累萬請予蠲除俱 報可初尙氏旣平勅藩下官屬兵
奴惟遼東舊人及賣身者造冊歸旂餘悉放爲民已而
告訐者衆株連不絕徽蔭請嚴妄首之罪從之或以詩
語爲仇所計徽蔭謂詩作于前代可勿問焚于庭三十

一年擢浙閩總督免歸尋奉 命分修南河以勞卒

廉勤吏所急其要在不苛孳孳務休息政簡民斯和能使役者息還聞耕者歌網羅一以豁王路無偏頗

侍郎折庫納

滿州鑲白旗人

順治十五年始改內三院爲殿閣別建翰林院衙舍時折庫納官國史院學士兼禮部侍郎改翰林院掌院學士仍兼禮部侍郎明年秋八月上疏陳四事一言滿州披甲人征役甚煩授田甚少生業凋零艱難日甚宜用均田之法俾無不足之憂一言京師諸固山披甲馬兵不過百人一有緩急何所恃賴宜令直隸山西陝西河南諸邊地有精壯善騎射者每年選貢京師編入烏真

超哈牛衆以時訓練用資策遣一言綠旗官兵徧滿海
內一有寇警全無實益仍須遣發禁軍此將帥失人故
也宜慎選提鎮甄拔營官簡練銳士汰其老弱庶軍政
克修人知自厲一近日江南遇寇州縣或望風降賊或
縛官獻城是必有姦宄之徒首爲倡亂脅誘平民設
天討所加盡行誅戮不但傷我國家如天之仁恐後此
有不幸陷賊者將益堅其從逆之心請速 諭大兵但
戮渠魁其餘概從赦免則戶口不至傷殘而 聖德

垂于萬世矣疏入下所司議多見施行尋調左副都御
史康熙七年與同官金世德等疏言督撫處分止有貪
墨欠賦違限錯擬等罪而百姓失所地方不治並無處

分殊非設官本意自今有犯此者宜革職治罪以懲不
恪從之十年授兵部督捕右侍郎十六年卒官

雲雷奮經綸師武其臣力誰能固金湯其本在足食殍草勿
傷苗得民斯得國蕃宣待甫申出入恬作息

參議戴璣利衡

福建長泰人順治六年進上

順治中利衡官湖廣按察司僉事整飭上江防道時滇
南用兵湖湘騷動利衡相視險要自岳州至嘉魚立七
汛設邏卒置哨船又于洞庭湖立三汛申嚴法令盜賊
屏息遷陝西布政司右參議以憂歸服除補廣西右江
道駐柳州會諸苗數蠹動檄降韋兆熊龍苗黃周等斬
其渠梁邦傑苗人以靖柳堡舊有屯田賦民耕歲輸軍

租兼應戶役民弗堪爲請于上官免其役尋以裁并道
缺免歸康熙十三年耿精忠反海賊亦入據海澄明年
圍漳州次子鱗爲海澄公裨將守東門賊劫利衡至城
下使招鱗利衡大聲曰兒努力勿以我爲念賊怒牽去
城破鱗巷戰死十五年大兵復漳州賊遁利衡乘閒逃
入山妻及幼子並爲賊擄去十七年賊復陷長泰利衡
再被執脅之降不屈幽之密室日誦文信國正氣歌十
八年六月忽謂其子銳曰吾久辱不死何爲遂不食數
日將死肅衣冠北向再拜起就坐大書惟忠惟孝可以
服人嘔血數升而死

滔滔洞庭波杳杳龍城道泊然兵革閒良莠並懷保一語哪

大倫舍命奮天討千秋正氣歌忠孝以爲寶

侍講施閏章尙白

江南宣城人順治六年進士

順治末尙白官江西分守湖西道轄臨江袁吉安三州
時諸流民多阻險爲盜尙白結以恩信就撫者衆闢龍
岡書院招諸生講學其中于時爲文章者承明之敝多
噍殺之音至尙白始復古其爲詩多以中聲出之在湖
西時感時憫事有元杜之遺風以裁缺歸諸生爲位祀
之龍岡尋舉博學鴻儒官終侍講

元杜久不作國風空復陳仁心激哀響
春氣文章變清醇龍岡一瓣香寂寞桃花津

漕督蔡士英魁吾

錦州人隸正白旗漢軍諡襄敏

順治九年魁吾巡撫江西時兵亂甫定民多流亡前巡撫夏一鶚及南贛巡撫劉武元奏請除荒田賦額事下督撫按數稽核魁吾上言二臣所奏遺漏尙多現今查出通省荒田十萬七千五百四十一頃有奇較前所報實多二萬五千六百頃有奇若荒稅不除則流亡不歸流亡不歸則盜賊日熾除之便 詔從其請十年江西布政使莊應會入覲奏瑞袁二府自僞漢竊據以來科糧獨重宜量減浮額與他府相準事下督撫巡按魁吾言瑞屬額糧現有二十二萬四千宜準宋元舊額減至一十二萬五千袁屬現徵額糧每畝一斗六升加七八合不等宜照他府上則每畝減至九升三合 詔並從

之居民稍稍復業十年冬報所屬三十九州縣其墾荒
田一萬九千八十餘頃時 朝廷方有興作或言廣信
封景山產木部臣以 聞事下督撫魁吾言山故盜藪
久封閉且路險木難致不宜擾民乃罷先後僞將曹志
攀汪文生霍武等率衆擾江西遣兵迎勦悉降之十二
年擢漕運總督以疾休

湯火脫餘生骨髓已先竭何人汲西江頓使枯魚活艱難繪
流民浩蕩瞻 天闕苟能靖盜源安用麾征鉞

總督郎廷佐一柱

鑲黃旗
漢軍

順治十二年一柱巡撫江西時方用兵徵餉急一柱疏
請只徵新糧帶徵逋稅一分部議不可十三年春復以

江西頻遭水旱請蠲逋賦 詔免順治八年之賦尋奉

命總督兩江疏陳江南三大困一江南官多以積欠

降調宜寬其考成戴罪留任課後效一江南自八年至
十三年積欠四百餘萬宜分別在官在吏分二冊按數
清追其民間實欠另爲一冊明示十年止徵若干使諸
道分頭督催右布政使總之一切新科專責左布政使
以杜征新補舊之弊一大軍所過封船載兵商民坐困
現今江西造船以備兵用江南亦可踵行 上嘉其

言切下部議行已復上疏請修海備一六年六月鄭成
功入寇率衆十餘萬破鎮江犯江寧時江寧駐防兵少
會梅勒章京噶褚哈馬爾賽等統滿兵自貴州凱旋聞

警疾馳至一柱偵賊船未集出師邀擊敗之七月辛未
成功合衆十餘萬從陸攻江寧連八十三營爲久困計
蘇松總兵梁化鳳統兵三千與江南浙江諸路援兵先
後集辛巳一柱督師由儀鳳鍾阜二門出戰擒斬賊將
三人明日水陸並進賊踞山以待我兵自下仰攻殊死
戰大破賊擒其將甘輝焚賊艘五百餘追至鎮江成功
遁入海尋乞休云耿精忠反起福建總督卒于金華祀
江西名宦祠

屯倚重臣享江海入掌握根本求民依籲天振熒獨一戰挫
鯨鯢萬井安耕牧新糧榮舊糧豫章尙戶祝

巡撫郝浴冰滌

直隸定州人順治六年進士

順治中冰滌以御史巡按四川請開屯田足兵食爲收
抬全川計九年賊孫可望等糾衆五萬圍保寧冰滌率
士民城守會吳三桂兵自綿州至乃解先是三桂戰屢
敗又驕橫兵不戢冰滌屢上疏陳逃兵劫殺及封疆失
守狀至是敘功冰滌辭賞語復侵三桂三桂恚以欺罔
劾之遂譴戍遼陽居二十年潛心經義好孟子二程子
書三桂反魏環極再疏薦之起故官尋出撫廣西卒于
官

一劒挂危城銳氣何嶄峇觸邪傲無將要使亂源窒
翛然遼海濱不出尼山室寥廓天壤間魏公秉直筆

學士曹本榮木欣

湖廣黃岡人順治六年進士

木欣少好陽明王子書及入翰林得館師胡此庵激發
退而深思一年豁然有省遷司業以正學爲六館倡順
治九年冬十月應 詔上言 陛下得二帝三王之

統當以二帝三王之學爲學宜開經筵討論經史以廣
業崇德一切章奏事宜必延見輔弼大臣面議可否獎
廉而禁貪藏富以足用慎刑罰定制度天下幸甚 報

聞至十二年四月 詔舉行日講擇滿漢詞臣七人充
日講官木欣與焉累遷左庶子十四年二月 詔以易

經一書義精用博先儒注釋互有異聞宜加採擇勒成
一編 令大學士傳以漸與木欣司其事九月丙午肇
舉經筵于保和殿以木欣充經筵講官復奉 命纂修

歷代通鑑累遷國史院侍讀學士康熙二年以疾乞歸
卒于揚州臨卒起沐浴正衣冠視日影方中危坐而逝
明主貴勸學廣益由虛衷一言端治本四海熏王風覃思緬
遺矩責難昭靖共觀化一何遽危坐日方中

給事中季開生天中

江南泰興人順治六年進士

順治十一年秋七月天中官禮科給事中因地震上疏
言夫地道不靜民不安也民之不安官失職也官之失
職約有十端一曰格 詔旨二曰輕民命三曰縱屬官
四曰庇胥吏五曰重耗尅六曰納餽遺七曰廣株連八
曰闇詞訟九曰失彈壓十曰玩糾劾分疏其目以上乞
敕督撫力加洗濯章下所司旋調兵科給事中

年秋乾清宮成 敕遣內監至江南采辦器物途中多有訛言天中上疏諫下刑部杖贖流尙陽堡尋卒于戌所十七年夏五月 命吏部察諸罪謫言官 詔曰季開生建言原從朕躬起見准復原官還其櫬廕一子入監讀書

草野待恩波宮庭爲之柄氣志日清明四海納淵鏡風聞信多訛臣直由 主聖雷霆不須與翹首高天淨

布政于朋舉念劬

江南金壇人順治六年進士

順治中念劬官睢陳分巡道有盜夜入鄆城劫庫帑殺縣官去縣官念劬婦翁也衆疑盜在城中營將統兵至城下縣人大驚傳言且屠城念劬疾馳入飭吏閉城門

距營兵營將走訴諸總督總督召念劬詰之對曰朋舉
豈不欲得盜而甘心者然柰何株連平民總督悟未幾
果獲盜他所尋遷福寧道興化協鎮官所部卒故降盜
驕悍與張給事僕有卻掠給事家縊其黨一人指爲僕
所殺勢張甚念劬集文武官會訊得實誅三人而釋其
餘軍民帖伏復遷湖南布政使罷去渡洪澤湖裝輕舟
人以巨石鎮之念劬笑曰此石豈鬱林物耶

真儒仁是戴不爲私情淆所難在倉卒明決爭秋毫刑者厯
三人四境靜無佻一笑鬱林石與汝輕風濤

總督張朝璘

正藍旗
漢軍

順治十三年朝璘任江西巡撫時亂賊初定田疇荒蕪

南昌瑞州爲甚而額徵如故巡按御史竺重光題請豁免事下督撫朝璘疏請除現墾田四千一百八十七頃有零俟三年起科外其未墾田尙有二千八百七十四頃二十五畝有零槩應豁免 詔如所請十八年擢江西總督康熙元年右布政使王進入覲奏南昌屬寧州一州南昌新建豐城進賢奉新靖安六縣以宋額相較計_{浮糧}折銀一十九萬五千一百二十二兩浮米一十四萬九千一百三十一石請與袁州瑞州一體豁免先是順治四年巡按御史吳贊元以南昌袁瑞浮糧上聞部覆俟賦役全書告成另爲頒示九年右布政使莊應會入覲時復以袁瑞浮糧本末呈揭下巡撫蔡士英覆

奏豁免而南昌因兵燹後志牘無稽遂不復及至是部
臣覆王庭奏以南昌既有浮糧先日何以不與袁瑞二
府彙題事下督撫朝璘疏奏南昌瑞袁舊爲僞漢所據
同一壤土並有浮糧詳見志書南昌一府除武寧一縣
係陳友諒生身之地獨免浮糧其一州六縣浮糧實數
如庭所奏明承故額而考成率用六分尙不能完今例
十分全徵民實難堪應請與瑞袁二州一體豁免 詔
並從之在江西十餘年裁缺還京康熙五年復任浙閩
總督尋乞休

解雨徧甲圻幽谷仍枯蓼誰能駐陽光次第山華開流毒久

辛螯歡聲乍春臺羣賢方底績

元首實明哉

知府尹明廷冀階

江南吳縣人順治六年進士

冀階官平樂知府順治九年李定國陷桂林兵且至會
刑部主事施尙白奉使過平樂冀階置酒與訣曰君使
臣也宜速行某守是城死矣乃募勇士嬰城守十餘日
城陷定國欲降之不屈大罵支解之事聞贈太僕寺卿
其明年子正始從閒道訪父尸不得哭于路有老嫗告
曰尹公被害良苦老婦與某某三人共埋骨某坊之側
今獨我在耳指其地出骨正始嚙指血驗信遂負而
歸

冀階一文士捐軀付危城慷慨別舊友從容盡平生力窮氣
益奮骨碎心不驚遺骸誰所守萬里歸先塋

知縣宋永譽葆恥

直隸永平人

葆恥知郿縣總兵賀珍反葆恥治守具集衆乘城衆謂力不支且死葆恥曰臣子之義與此土俱存亡死固也吾安之矣賊使至則斬以徇明日賊薄城五日城破執葆恥誘之降葆恥大罵賊索印不與遂見殺贈陝西按察使僉事

自古皆有死一言定民志安知臣力竭獨了平生事陽陽申丞顏耿耿文山氣時勢有不同致命曾何異

知縣王起彪虎子

浙江鄞縣人

順治中虎子知德興縣畔將金聲桓黨董三率賊破城挾虎子去脅降不動乃張筵請觀樂酒半僂人爲武安

王舞一賊持杯進曰武安云降漢不降曹誰謂漢耶虎
子曰吾奉 天子命知此邦非漢乎賊曰是滿也非
漢也曰堂堂天子莅中國而撫四夷誰云非漢者賊曰
然則請君還漢耳遂戕之弟起芬聞變走千里收其尸
歸

到官不旬日之死無二心談笑入虎窟肝腸照霜鐔 皇家
大一統草賊方成擒艱難斂遺骨笙磬誠同音

給事中趙吉士天羽

江南沐寧人順治八年進士

康熙七年天羽知太原交城縣縣北有交山故盜窟聚
黨數千出沒鄰近諸州縣天羽至申嚴守備結山人
爲耳目圖繪諸險要得諸賊去來蹤跡會 朝命飭總

督速調官兵勦殺淨盡天羽言交山有名劇盜不過十
餘人其他率烏合不足煩大舉請密圖之遂以計攜其
黨從容治文書行鄉飲酒禮與諸僚友登山燕飲泛舟
城南湖爲歡樂旋修復山南靖安堡請兵以駐防爲名
突率兵入山盡獲賊渠餘賊散走交山遂平敘功入爲
戶部山西主事累遷戶科給事中

治亂若治絲引端得竟委解牛不見牛游刃恢恢矣止則靜
如淵動則疾如矢古稱王者師取殘非得已

少詹事耿介石

河南登封人順治八年進士

介石爲人清鯁踐履篤實順治中官檢討出爲福建巡
海道時海疆未靖築石城以備盜興廉去貪革除苛政

恩信大行康熙元年轉江西湖東道改直隸大名道時
方嚴旗下逃奴之令行所過輒以窩逃罪之株連動三
四十人介石在官期年清三百餘案分別輕重釋諸無
辜民甚德之丁母憂歸從蘇門孫徵君游闡明正學復
嵩陽書院以造士二十五年湯孔伯以禮部尙書掌詹
事府疏薦介石 召入爲少詹事並輔導 皇太子會
孔伯爲執政所嫉倚撫萬端介石遂引疾乞休詹事尹
泰等劾介石詐疾因以傾孔伯尋予假歸仍主嵩陽講
學不輟嘗與孔伯書以爲道本庸作不得一些聰明
執不得一些意見逞不得一些精采孔伯以其言爲然
介石砥儒行到處流仁聲歸來一瓢飲絕學懷羣英靈鳳不

隱世翩然衆鳥驚同心兩睽隔寂寞空山盟

通判張壘牖如

江南長洲人

牖如負才幹急人之難爲鄉黨所倚重教習官學期滿康熙十七年授河南登封知縣旣至革除私斂招徠流亡督之耕種相土宜分樹木棉及諸果實修復嵩陽書院延鄉先生耿介爲之師以正學爲諸生倡別立學舍二十一所課諸童子以時巡閱正其句讀周厯村舍恤其孤癯教以禮讓民俗或好訟舉其賢者爲鄉約俾化導其鄉旌其義夫貞婦復其徭頃之俗爲一變路不拾遺家設牖如位旦夕祝大書官清民樂于門二十二年遷廣西南寧通判病免歸

廉恥在斯民不爲箠楚用刑法日紛苛久乃若潰壅當務首
農桑其次在弦誦尼山亦有言必也使無訟

河道戴聖聰無聰

益州衛人

順治中無聰知乾州時方用師滇蜀州當孔道一將軍
頓兵城外縱士卒入城爲暴無聰下令閤門不聽入軍
大噪曰州人反矣將軍引兵欲攻城無聰出見將軍數
之曰王師所至當使義聲先路而暴犯平民從此而南
誰不悉死拒我且不聽軍入城者聖聰也殺聖聰一人
足矣將軍感悟以馬鞭授之曰吾士卒入城一步者卽
手此扶之州人乃安累遷睢陳徐河道按察司副使請
除徐州荒田賦八千餘頃會河決宿遷且灌城築堤防

之甫卽工風雨大作浪聲如雷無聰方坐堤上左右請
少避無聰曰居民數萬倚此堤生死堤不就吾與波上
下耳手持薪槌塞決口衆咸奮爭前負土不日堤成已
而坐隱屬官罪鐫級去靳文襄爲河督欲留之以母老
辭終于家

奮死激忠誠萬夫勇莫奪能開武人顏獨障河口決回光照
窮簷白日融春雪綽綽進退閒卓矣歲寒節

推官竇可權雲明

河南河內人順治九年進士

順治中雲明爲汾州推官除暴惠良人稱之曰竇佛行
部過沁州州守懷金十鎰夜視寢潛置牀下雲明覺之
召守還其金其屬有升秩者大吏挾其陰事以要賂雲

明持不可遂劾雲明罷之去官日汾人念其貧爭獻錢帛不受自汾至銅鞮山數百里送者執香花夾道旁有泣下者歸築室奉親以老雲明少時遇羣兒戲常獨危坐袖手觀之人以是覘其器焉

直道天所命瓠落非吾憂焚香拜活佛戒律森高秋別淚灑長路清風引歸朝羣兒空見嚇一笑青山頭

總督朱昌祚雲門

懷白旗漢軍諡勤愍

順治十八年雲門任浙江巡撫平土寇賑飢民聲績甚著康熙三年遷福建總督以丁憂未之任尋移直隸河南山東三省總督五年冬朝議以旗人所受近畿地多瘠薄遣官度民田易之先是授旗田時民間失業者

衆至是益騷動呼號遍野雲門與直隸巡撫王登聯以
疏問力陳民困請罷其役輔臣鼂拜惡其異已下二人
刑部立絞死 聖祖既親政乃下 詔雪其冤立碑
墓道

赤子飢欲死忍復扼其吭九關當虎豹擇肉無忠良熱血灑
荒野丹心鑒 聖王請看墓隧石五緯垂寒芒

督捕徐越山琢

江南山陽人順治九年進士

世祖朝懲明之弊 敕責臣下沽名市恩令對狀

諸臣輒惶恐引罪山琢官御史上言諸臣精神智慮但
保功名每奉 敕回奏僥倖無事推其初心有不盡然
者畏懼之念轉爲推諉萬幾叢集事特獨斷所問治忽

非淺請召對大小臣工並許反邪指陳寬好名之禁以
厲中材留死徙之刑以待大惡天下幸甚康熙七年諫
罷采木川湖 駕將幸塞北亦以山琰言而止先後論
河漕事十六疏陳利害甚悉已而遷兵部督捕左理事
官引疾歸

龍德利正中下交而道泰徐君發苦口言路剗陘隘治河同
斯理下壅則旁潰大智講疏淪到海得無害

巡撫佟鳳彩高岡

正藍旗漢軍諡勤僖

高岡厯官封疆興利除病惟恐後時自四川移撫貴州
奏設科場經費以降雜派黔地多險阻而置驛疎濶自
軍興旁午士馬疲劇官費不足輒取辦州縣里甲謂之

挈驛黎民重困康熙八年高岡奏革挈驛而自貴陽以東增置六站由是官民大便之十一年改撫河南先是雨河歲有修築按地徵夫夫頭因緣爲奸歲徵銀至三四十萬高岡請發帑金官爲僱役報可時江南方興大工檄河南民採柳以應運者苦之高岡請敕聽需柳者自取弗煩民運十六年卒于官

施德不在多要在中民隱壺殮赴人飢望或踰指困山深驛走疲河潰窮簷窘靈雨一朝濡那復悲秋殞

